

DEWAN RAKYAT
PEMBERITAHUAN PERTANYAAN
MESYUARAT KETIGA, PENGGAL KEDUA
PARLIMEN KETIGA BELAS
(2014)

PERTANYAAN : LISAN

DARIPADA : YB DATO' HASBULLAH BIN OSMAN
[GERIK]

TARIKH : 28 OKTOBER 2014 [SELASA]

SOALAN :

Dato' Hasbullah bin Osman [Gerik] minta PERDANA MENTERI menyatakan kaedah pengagihan zakat kepada golongan layak di mana kini terdapat kaedah dan proses pengutipan zakat memudahkan rakyat. Namun untuk menyerahkan zakat adalah sukar dan ini seolah-olah zakat gagal menjadi agen membantu rakyat.

JAWAPAN: (YB MEJAR JENERAL DATO' SERI JAMIL KHIR BIN HAJI BAHAROM (B), MENTERI DI JABATAN PERDANA MENTERI)

Tuan Yang di-Pertua,

Sebagaimana Ahli Yang Berhormat sedia maklum, di bawah Butiran 1, Senarai 2, Jadual Kesembilan, Perlembagaan Persekutuan, hal-ehwal Agama Islam termasuklah urusan zakat terletak di bawah bidang kuasa Kerajaan Negeri. Oleh itu, pelaksanaan aktiviti agihan zakat adalah berbeza mengikut setiap negeri berdasarkan dasar dan pertimbangan pihak berkuasa agama negeri masing-masing dan Kerajaan Persekutuan tidak boleh mencampuri urusan dalam perkara berkenaan.

Berhubung dengan persoalan **kaedah pengagihan zakat**, suka untuk saya mengambil contoh di Wilayah Persekutuan yang diletakkan di bawah saya sebagai Pengerusi Majlis Agama Islam Wilayah Persekutuan (MAIWP) yang merupakan agensi yang menguruskan dana zakat. Kutipan zakat harta di Wilayah Persekutuan dilaksanakan oleh Pusat Pungutan Zakat MAIWP (PPZ-MAIWP), manakala agihan zakat dilaksanakan oleh MAIWP melalui Bahagian Baitulmal.

MAIWP dari masa ke semasa sentiasa berusaha meningkatkan kualiti penyampaian agihan zakat agar proses permohonan dan penyaluran bantuan zakat dipermudahkan dan sampai kepada golongan yang memerlukan secara menyeluruh.

Selain menguruskan proses permohonan bantuan zakat di kaunter, MAIWP juga turun padang melalui Skuad Jejak Asnaf Baitulmal MAIWP secara berkala bagi mencari mereka yang dalam kesusahan dan memerlukan yang boleh dibantu melalui bantuan zakat. Skuad ini bekerjasama dengan komuniti setempat bagi mengenalpasti mereka yang layak. Sejak dilancarkan pada Februari 2012, seramai 1,263 asnaf telah berjaya dijejaki. MAIWP juga telah mewujudkan talian bebas tol 1-800-88-5222 dan hotline 012-5183614 dan 012-5127614 bagi membolehkan orang ramai melaporkan mereka yang dalam kesusahan dan kesempitan hidup kepada MAIWP.

Bagi memudahkan orang ramai khususnya golongan asnaf untuk berurusan dengan Baitulmal MAIWP, beberapa cawangan dikenali Pusat Agihan Zakat (PAZA) telah dibuka di beberapa lokasi strategik di sekitar Wilayah Persekutuan. Melalui pembukaan PAZA ini, mereka hanya perlu datang ke kaunter yang berhampiran dengan kediaman mereka di mana semua proses permohonan bantuan akan diproses di situ.

MAIWP juga telah memanfaatkan platform laman web dan media sosial seperti facebook bagi mereka yang mempunyai akses internet yang mana dokumen permohonan bantuan berkaitan boleh dimuat turun daripada platform berkenaan. Platform tersebut juga digunakan bagi membolehkan orang ramai menyalurkan maklumat kepada MAIWP mengenai mereka yang dalam kesusahan dan kesulitan untuk dibantu dengan bantuan zakat.

Sekian, terima kasih.

**PEMBERITAHUAN PERTANYAAN
DEWAN RAKYAT**

PERTANYAAN : BAGI JAWAB LISAN

**DARIPADA : Dato' Henry Sum Agong
[Lawas]**

TARIKH : 28 OKTOBER 2014 (SELASA)

SOALAN : 50

Dato' Henry Sum Agong [Lawas] minta **MENTERI PENGANGKUTAN** menyatakan apakah status permohonan rakyat khasnya daerah Lawas Sarawak dan Sipitang Sabah terhadap perhubungan udara terpenting iaitu sebuah Lapangan Terbang baru yang akan diguna pakai oleh penduduk-penduduk kedua-dua kawasan tersebut.

JAWAPAN

Tuan Yang di-Pertua,

Pada masa ini, Kerajaan menyedari akan keperluan sebuah lapangan terbang baru dibina untuk kemudahan penumpang-penumpang di kawasan Lawas, Sarawak dan Sipitang, Sabah. Dalam hubungan ini, satu kajian kemungkinan akan dijalankan bagi mengenalpasti kesesuaian dan impak serta tapak cadangan untuk pembinaan lapangan terbang baru tersebut.